

11 AUG 1997

Pelarian

BOSNIA DAN HERZEGOVINA PERLU MASA UNTUK SELESAIKAN ISU PELARIAN

KUALA LUMPUR, 11 Ogos (Bernama) -- Bosnia dan Herzegovina memerlukan masa untuk menyelesaikan masalah pelarian akibat perang saudara di Balkan, kata pengerusi bersama Majlis Menteri-menteri, Boro Busic.

Beliau berkata pelarian-pelarian kini sedang menunggu untuk melihat tanda-tanda pulihnya kestabilan politik dan perubahan ekonomi sebelum memutuskan untuk pulang ke kampung halaman mereka.

"Masalah kami sekarang ialah masyarakat antarabangsa mendesak supaya masalah pelarian diselesaikan segera".

"Tetapi saya pasti masalah itu tidak dapat diselesaikan dalam masa yang singkat," katanya semasa menjawab soalan yang dikemukakan dalam majlis ceramah umum mengenai perkembangan semasa di Bosnia dan Herzegovina di sini.

Majlis ceramah itu dianjurkan oleh Institut Diplomasi dan Hubungan Luar.

Busic berkata usaha mencari penyelesaian kepada masalah pelarian sama pentingnya dengan usaha untuk mengatasi masalah ekonomi negara itu serta melaksanakan Perjanjian Damai Dayton.

Perjanjian itu yang ditandatangani pada November 1995 antara presiden Bosnia, Croatia dan Serbia, berjaya menamatkan perang Balkan selama empat tahun.

Seorang lagi pengerusi bersama, Haris Silajdzic pula berkata penduduk Bosnia tidak mungkin berperang jika mereka mempunyai maklumat mengenai satu sama lain.

Katanya, pembangunan pendidikan perlu dilaksanakan selari dengan pembangunan manusia, jika tidak sistem pendidikan akan hanya melahirkan penduduk yang penuh dengan kebencian.

Kedua-dua pemimpin itu tiba di sini semalam untuk lawatan selama lima hari ke Malaysia atas jemputan Perdana Menteri Datuk Seri Dr Mahathir Mohamad. -- BERNAMA

MAM oba